

No Servus, Diener und Habe die Ehre!

Etze kummt dos

Nej su wos

vu Sömde, n 12. August 2023



Inge Fehrmann

Noch ane Hundegeschöchte: Großmuttrs Pfiffi

Pfiffi wor a Rehpintschr, ne sehr groß, obr sehr wachsom. Ha tot - ohne doss a n sog - genau wössen, ob ennr, dar n Hause nähndr kom, a Fremdr wor. Ha horte s on Schrieth. Und dann lehte a lus und kläffte goutsdrbärmlich.

Pfiffi wor Großmuttrs Hund, ha wor ganz of se eigestallt. Wenn se Frattich nouch Gablunz fuhr zun Kassiern, wos bis Mietwoche geliefert wurn wor, riehrte Pfiffi n ganzn Tag sann Fraßschorb ne o. Ou wenn mr ganz nounde zun Fraßschorbe ging, drnouch langte und sohte :“lech nahm mr sch“, knurrt ha zwor a bößl vu Futtneid, obr frassn tot ha neche.

Öm de Zeit, wenn de Leute vun Sechsrzuges hejmkomm, sprong Pfiffi of an Scheml, dar undrn Fanstr stond und dann nuf of s Fanstrbratl. Dorte hielt a Wache. Ei ar Weile wocklte ha min Schwanze und kloppte drmitte o de Fanstrscheibe. A Zejchn, doss de Großmuttr nemieh weit sein konnte. Se wor zwor noch ne zu sahn, obr Pfiffi wor schun ganz närrsch. Dann tot se endlich kumm. Wos fr ane Frejde, als ob ha se war weiß wie lange ne gesahn hätte. Ha sprong a poormoul o ihr nuf, winslte und bellte obwechslnnd vur lautr Frejde und tot sich iehr sann Fraßschorb harmachn. Drweile hotte mei Votr de Stubn-, Vurhaus- und de Summerhäusltiere ufgemacht und Pfiffi wor mit a poor Sätzn draußn, um dorte sei Geschäfte zu verröchn. Dos wor jedn Frattich su, wenn mane Großmuttr vu Gablunz hejmkom.

Grode a Held wor Pfiffi neche. O enn Suntsche wor a Fest vun Vetranrn. Die totn aus ihrer Kanoune ane Menge Böllrschisse luslossn. Dos hotte n Pfiffi su drschreckt, doss a uf und drvoune machte. Tagelang kom a ne azune. Mr sogn an Geiste schun ei ar Pfonne broutn, denn Hundefettn wor a beliebtes Hejlmöttl fr Leute vu dan Schleifmiehl, die s of dr Plauze hottn. Dou drvoune gobs an Lichtnbarge ne wing. Obr denkst de! Nouch 4 Tagn, Durschtich druf, bellte Pfiffi vur de Haustierte. A wor wiedr dou. A Stejn fiel uns vun Harzn. S wor a röchtschr Frejdntag! Wu Pfiffi gewast wor, hon mr nie ne rausgekrich. Ha wor ne vrwahrlost, ou ne obgemagrt. Gelittn hott ha bestömmt ne. Amende hott n ennr vu dan Hundefettn-Liebhobern noch a bößl rausfötrn wolln und dann wor n Pfiffi doch noch dorch de Loppn gegangen. Ejgol, Hauptsache mr hottn unsrn Ausreißr wiedr.

Doß Pfiffi kej Held wor, sohte ich jo schun. Obr de großen Hunde obelln und dann, wenn s Ernst wur, schnell Reißaus nahm, dos wor sei Ludrding. Mejtens totn de großen Hunde vu dan klenn Kleffzrn kaum Notiz nahm. Dos wor wull undr ihrer Wirde. Obr ejmoul tot dr Wolfshund vu Weikert-Fleischern Pfiffis Luderei ne vrstiehn. Schun hotte Pfiffi ane tiefe, lange Bößwunde om Holse. De Großmuttr tot n mit Schoufgorbe behandeln. Se träufte Schoufgorbnsoft ei de Wunde, wos bestömmt ganz schiene gepfaffert hout, obr vu dr Großmuttr tot ha sich s gedoldich gefolln lossn. De andrn aus dr Familie dorftn ei dar Zeit, bis de Wunde holbwaigs obgehejlt wor, obr ne zu nounde kumm. Dou wur ha röchtsch biese und tot de Zähne fletschn. S dauerte ou ane ganze Weile, bös a wiedr öm enn Wörfel Zockr battln und a Mannl machn tot.

Ols a sane Juhre of n Puckl hotte und ha ömmr tschaatschrchr wur, hon mane Großaldrn schwarn Harzn beschlossn, Pfiffi eischläfrn zu lossn. Su nouble Möttl wie Eischläfrn mit aner Sprötze odr Troppn wor an Lichtnbarge salt ne Moude. Feistner-Alfred hotte aus n orschtn Weltkriege noch ane ale Armeepistole, und su krichte dar dan traurichn Uftroug. O dan Tage und noch ville Tage drnouch wor ei Kaulfuß-Fredls-Familie Trauer ogesoht, dos wor olles su drgreifnd. De Großmuttr fuhr etze efrsch nouch Gablunz und s Assn hout r ou nemieh su geschmackt. Dou hout mr beschlossn: “A Hund kummt nemieh ei s Haus!“ Drbeine ös es ou gebliebn. Bei dr Aussiedlung hottn se su ej Problem wingr. Meintr ne ou?
